

# OMUKUETU

No 6.

JUNI

1956.



KALUNGA MUENE TA LICA AANTU JE.

Hesekiel 34:11-16.

Moteksti jetu Kalunga ta popi, nkene oje muene ta lica oonzi de. Nando ojo di li po da halakana, oje ote di kongo nota kala mokati kado, e di lice. Oje te di galulile kiinapelo iuanaua, koondundu di nomuidi nokomasilu ge nomeja. Otadi vulu okugondja nombili, manga omusita guado omuuanaua te di tonatele. Oje ha kongo aluhe doka da kana, nota galula doka da halakana, nota manga doka da teka, nota koleke doka da suunkundi. Komauvaneko ngaka agehe omauanaua Omuaa Kalunga ta guedele ko etumbulo limue edigu, oje sho ta ti: Odoka do ondoka noda kola otandi di mana po (nenge ngashi melundululo ljetu tamu tiua: otandi di langele). Na mpoka uo Kalunga ote di lica, ngashi di nokulicua.

Oohapu dika duuprofeti odu uuvicilua tango oshiguana sha. Kalunga sha li muupongo uokuBabel. Oshili, osha halakane kiilongo niilongo omasiku ngejaka omadigu, oshilongo shasho sho sha matukilua kaatondi aadigu. Aapangeli naasaseri ja dipagua noja kuatua aapika. Oshiguana osha li sha foshigunda shaa nomusita. Opo mpoka Kalunga ta ti: Ongame muene onda hala ndi shi konge, nondi shi galule, nondi shi lice naua, ngashi shi nokulicua. Kalu-

nga ota uvanekete oshiguana she, oje muene e shi sile naua oshimpuiju. Oje ota kongo tangotango mboka ja kana notaa pumbua okugalulua. Oje ota manga iilalo joomuenjo nota koleke mboka ja suunkundi. Ihe oje ota kongo uo aanene mboka taa hepeke ashike oojakuauo. Ojo itaa ecua, inaa geelua, oshoka ojo ja kala kaaje nohenda noojakuauo noja jono ngeji oshiguana sha Kalunga.

Ajihe mbika Kalunga okua hala oku ji longa uo moshiguana she shongashingeji omegongalo ljaakriste. Oje muene a hala e li lice, sho e shi uete, omboka e ja lungeke mo ja kale aasita, oluindji otaa njengua no taa puka. Eeno shili, otse aasita oluindji tua kuatua konjalo nokuuhecki, sho tua li tu nokukonga mboka ja kana nokumanga mboka ja teka moondjila domapuko gauo. Oluindji otua kanica ombili neididimiko notua tameke oku ja denga ashike. Onaua Kalunga sho te ja sile oshimpuiju muene, opo o oopaleke shoka tue shi jono. - Nisheue, oluindji tse aasita otua tila okuguma aanene mboka ja pijaganeke oshigunda. Otua tila, pamue otaje tu tsu notaje tu canga, nge tatu jelekele oku ja pukulula. Onaua sho pe nOmunankondo ngoka ita pumbua okutula omuntu. Oje na lice ajehe, ngashi je nokulicua.

Pulakena oohapu dika, ongoje omukriste omunjengui. Pulakena dika, ongoje ngoka ui idimbulula ua kana. Natango u netegameno. Nando aantu ja njengua oku ku kuaca, natango ope na ngoka ta ti: Ongame muene nda hala ndi ja konge. Oje tuu omusita omukuluntu. Oje tuu omusita omuuanaua. Oje a tseja naua omuenjo guoje. Oje ita pumbua okukongakonga oshilalo, nkoka shaa li. Oku shi uete nota kuata kusho, e shi mange. Ino tila uuehame uokupangua! Oje e shi shi, shoka ta ningi. Mbalambala u li isheue miinapelo jo oopala; oto kuticua kuuanaua ua Kalunga ngashi naale, manga ua li inoo kana. Inekela shili eui ljomusita guoje! Ino jondapo, ngele te ku icana! Igandja kuje, ngashi u li! Oje ote ku lica, ngashi u nokulicua.

Pulakena uo oohapu dika, ongoje omukriste omunene ui inenepeka. Pulakena dika, ongoje ngoka u li moshigunda sha Kalunga ho canga oojakueni. Jamue oja tsuaa nokuli kooniga doje da hongu. Kotoka, ua monika nokuli komusita guoje omukuluntu! Oje ita tila oku ku kuata. Ote shi ningi noonkondo de adihe. Ongoje ngele ito itedulula mbala, ito peua ue ecimbo lilue ljeitedululo. „Iihuna jouala okuguila moshikaha sha Kalunga omunamuenjo.” (Heb. 10:31.)

Moshilongo sha Kalunga omu noshipango tashi ti: „Kalunga ha tondo aaholu-uuntsa, ihe ta silohenda aaneifupipiko.” (1 Petr. 5:5) Ongoka kee na ko na sha noshipango shika, oje ota ka cikamenua kusho esiku lja hugunina. Ihe komufupi ngoka ta kugile Omuaa ekuaco, osho euuvaneko lja kola nemanja ljuhupico.

E.J.P.

## OSHIKE ITANDI PAPUDUKA?

Momaongalo mu novañu vahapu va papuduka, ndele ame inandi papuduka oshike?

Oua hala ndi ku njamukule? Heno! Ila hano tu je kOmbimbeli, ndi ku ulukile ombedi apa ji li, eshi ito papuduka.

Lasha Rom 8:5. „Ava va kala pambelela, otava diladila eshi sumpambelela.” Ua uda ko? Ito papuduka nenge omadiladilo oje eli pambelela. Ovakriste ava va hala okukala pambelela, otava tondo epapuduko, shaashi otali hu'ifa oilonga jokukala pambelela muvo.

Lasha vali overse 6. „Osheshi omadiladilo ombelela, oo efjo! U shi udife? Hano ito papuduka osheshi omadiladilo ombelela, okue ku dipaa. Tala vali apa moverse 13 pehovelajo: „Osheshi nenge tamu kala pambelela omu nokufja.” Hano ku na nande efiku u ninge omupapuduki nenge to pangalua kombelela. Ito efa oikoluifa, ito efa onakaja, ito efa oluhajelo, shaasi oininima ei, ojo ombelela. Ku na apa

Etsikilo kep 8.



# OMUKUETU

Juni. 1956.

## PECIMBO LJOMUKICI.

Omumvo nguka ogua kala sigo ngashingeji omumvo guomikici omidigu. Peta meko ljomumvo otua kundana uuvu uepata ua li miilongo jokOkavango nokuAngola. Oonkundana doka sho da hulu, otu uuvu omukici guomomuligu gua tameke okudipaga aantu kUukuanjama. Sigo ongashingeji oko gu li nogui itaandele nokuli luokuuninginino.

Pecimbo ljomukici ohapu pumbua iipango ja kola, ope omukici guaa taandelicue. Osho uo ngashingeji aapangeli jetu oje tu uucile omauco gi ili nogi ili notaje ga tonatele uo, ga guanicue kuajehe. Otu nokuididimikila omaindiko ngoka nomalombuelo ngoka, oshoka ogo agehe otaga lalakanene ekuaco nehupico ljetu.

Pecimbo ljomukici otatu dimbulula uuanaua uepangelo ljetu. Ongashingeji uo aapangeli jetu oji ipjakidile shili je tu sile oshimpuiju jo je tu kongele ekuaco manga ku jele. Epangelo ljokuWindhoek olja futu iiponda ojindijindji, opo li tu landele omi doouenda ljo li di tu tumine. Oondohtora jepangelo oji ihepeke shili omoluetu, opo tse atuhe tu mone ekuaco ndjoka tue li pumbua. Otu nokupandula epangelo ljetu euanaua naajakuli jaljo aadiginini. Ope nohoni onene, sho pua holoka aantu mboka je ja lundile uaji noji imbi ngeji iilonga jauo iuanaua. Ando aatoti mboka jifundja ja monike, opo ja mone egeelo ndjoka je li ilongele!

Pecimbo ljomukici opua monika uo, nkene etumo ljevangelu lja hala okuetela omuntu kehe ekuaco nokomuenjo nokolutu uo. Aavu ojendji oja gamenua keso, sho je etua koshipangelo. Omboka inaa aada koshipangelo manga ku jele, nenge inaa hala ko, oja sile miikaha joonganga nojaanjengui jalue. Aapangi jetu aatiligane naaluude oja kondjo noonkondo dauo adihe, ja kuace ojendji mboka ja pumbua ekuaco pecimbo ndika. Kalunga na hambelue omoluhoole jauo nuudiginini uauo, na shoka e ja pe oonkondo da guana!

Pecimbo ljomukici tapu monika naua, nkene omikalo da jela tadi kuaca omuntu. Omboka ja longua mooskola okulalakanena uujogoki auhe momagumbo gauo nomokukala kuauo, ngashingeji oja guana okupandula aalongi jauo, oshoka oja dimbulula, nkene uujogoki hau keelele uuvu nohau popile ngeji omuntu negumbo lje. Ando oshinima shika shi dimbulukiue uo pecimbo ndjoka sho tu li naua atuhe.

Pecimbo ljomukici, ngoka tagu dipaga aantu, otatu dimbulukicua uufupi uoondjenda detu, nonkene katu na nkuka omutumba gua kolelela. Otatu kumagidua, tu longekide omagumbo getu, oshoka otu nokusa. Kalunga ngoka e tu uucile uule

## EVA MARIA, OMUTANGO GWAAKRISTE AAWAMBO.

*Okuza keshako ljomuwambo gwctango eti 9 lja Junie 1876 sigo eti 9 lja Junie nuumvo pwa piti oomvula 80. Mfaka otatu kambadhala okuhokolola omutango ngwijaka, nkene a ningi omukriste. Ngele pe na mboka ye shi kugwedhela ko sha, onaua ngele taye shi tumine wo OMUKUETU.*

Muuyuni wonaale, manga Nuuyoma wEelu a pangele kUukwambi, koshilongo shOmbandja okwa kala okakadhona edhina lyako Nanguroshi. Esiku limwe kOmbandja okwa uuvika onkugo onene, oshoka aakwambi oye ya matukile iita. Yina ya Nanguroshi okwa lombwele oyana, ya ka holame miihwa, nokwa ti, ote ke ya landulila mo komeho. Nanguroshi naamwayina oya ningi, ngashi ya lombwelwa, noya matuka ya ka kuutumbe miihwa ye nuumbanda owindji. Nando ya li kutegelela, yina ine ya kuyo. Ohaluka yowala aakwiita aakwambi oye ya mono noye ya kwata aapika. Pamwe nooyakwauo oyendji oya falwa kUukwambi muupika.

Omumvo 1870 kUukwambi okwe ya aahongi aasoomi: Kurvinen na Veikkolin na Rautanen (Nakambale) na Piirainen. Manga Nanguroshi kwa li a gwanitha oomvula 8, omukwaniilwa Nuuyoma okwe mu gandja komusamane Kurvinen, a ninge omukalele gwe. Inapa pita ethimbo ele, uukuume pokati komukwaniilwa naahongi wa teka. MuMei 1872 Nuuyoma okwa tidha aahongi ayehe moshilongo she. Moku-shuna kwauo kOndonga Nanguroshi wo okwe ya landulile ko.

Nanguroshi okwa li hu uuvu esiku kehe oohapu dha Kalunga pongulu. Odho dha tameke oku mu hololela uulunde we. Eiuu-

uomasiku getu, oje auike a tseja esiku lini ljahugunina ljokukalamuenjo kuetu. Otse otu nokukala tui ilongekida ecimbo kehe.

Pecimbo ljomukici otatu icanua ku Kalunga neicano lja kola, tu konge ehupico puje. Oje omushiti guetu nOmukulili guetu e noonkondo okuhupica oomuenjo detu nomalutu getu miiponga ajihe, nomoshiponga shoka sha aluhe. Ekuaco kehe euanaua oli nekota ljaljo muje. Shaa tatu igandja kuje, otse itatu pumbua okutula sha. Ecimbo lja tja ngaaka oljo uo ecimbo ljekongo ljetu, tu itedulule.

Pecimbo ljomukici omuntu oti ilongo okugalikana. Itatu pumbua ue okupula, shoka tu noku shi indila. Otatu iindilile ekuaco. Otatu galikanene oojakuetu mboka je li muudigu. Otatu galikanene oshiguana shetu ashihe, shi hupicue miiponga nomeso. Otatu galikanene aajakuli jetu ja mone kuKalunga oondunge noonkondo oku tu kuaca. Ihe mokugalikana ngaaka inatu dimbueni ehambelulo nepandulo omoluoma-kuaco ngoka tue ga mono nokuli.

Kalunga ne tu kuace, tu taambe omalongo ngoka a hala oku ge tu longa pecimbo ndika ljomukici.

vo lye olya papudhuka. Ihe omikalo dhe omiwinayi dhuupagani odha tsama wo muule uomwenyo gwe. Eputudho lye olya pula kaakuluntu ohoole neidhidhimiko olindji.

Konima yoomvula mbali omuhongi Kurvinen okwa tokola a shune koshilongo shaandjawa, oshoka okukala kwe kOwambo okwa dhigupala unene Mókudhiladhila Nanguroshi omuhongi ina hala oku mu laleka, oshoka okwa li kee na mpo ta yi. Onkee oyu uuvathana naye, e ya landulile sigo koSoomi. Oye ende nawa ondjila ndjoka onde noya thiki ko omumvo 1875.

KoSoomi Nanguroshi okwa kala mokati kaakriste. Oye okwi ilongo uuwanawa owindji. Ihe omamakelo oko ga li wo. Onkee momwenyo gwe omwa tsikile ngaa ekondjo edhigu pokati koonkondo dha sata na dhoka dha Kalunga. Unene pethimbo lyokrimesa Mbepo gwa Kalunga a mono ompito ombwanawa okulonga momwenyo gwomukadhona. Nanguroshi okwa tala nenyanyu nonkumwe, nkene aakriste aasoomi ya dhana oshituthi shoka oshinene, nokwa pulakene omaimbilo gawo omawanawa. Ohoole ya Yesu oya tameke okumona eha momwenyo gwe. Nonaale Nanguroshi okwa li a hololele aakuluntu ye ehalo lye lyokuninga wo omukriste, ihe ngashingeyi okwa dhiginine shili okuindila eshasho. Okulongwa kwa Nanguroshi sho kwa pu, omuhongi okwa indile kewilikongundu lyehanganotumo, olo li uuthe esiku lyeshasho. Olyo lya fala oshinima shika kaakuluntu yongerki yaasoomi, nokwa uuvathanwa, omukuluntutumo Sirelius a shashe Nanguroshi eti 9 lya Junie 1876.

Tango okwa li kwa dhiladhilwa, Nanguroshi a shashwe mongerki yontumba, ihe aakuluntu oye etha edhiladhilo ndyoka. Oya li ya tala, omukadhona ti inenepeke, nge ta thikamekwa ngeyi komeho gegongalo enene lyaasoomi, mboka taye mu kuminwa notaye mu nyanyukilwa. Onkee okwa uuvathanwa, Nanguroshi a shashwe mongulu yetumo, moondjugo tuu moka mwa lalekwa aahongi yotango mboka ya zi koSoomi omumvo 1868 nishewe omumvo 1870.

Keshasho okwa kala aantu yamwe ayeke. Aawewilikongundu yehanganotumo oko ya li, nsho wo yaandja Kurvinen nookuume kawo yamwe. Omaimbilo ogi imbwa momalaka gatatu oshita: moshisoomi, moshiswedisa nomoshindonga. Omushashi okwa uuvitha oohapu dhi li mu Mat. 16:26 "O-tashi kwatha shike omuntu, nando ni ilikolele uuyuni auhe, e ta kanitha omwenyo gwe?" Oye okwa hokolola, nkene aahongi aasoomi naamati yawo oya li ya aadhika komaudhigu ogendji mokutameka oshilonga shetumo kOwambo, nokwa ti, iilonga yawo ayihe nomaudhigu gawo agehe na ayihe mbyoka ye yi gandja omolwoshilonga shetumo kayi shi sha, nge tayi yelekwa nenyanyu lyethimbo ndyoka, omuwambo gwotango sho ta shashwa. Ngashi yina ta dhimbwa uehame we, sho ta mono okanona ke, osho wo aakriste aasoomi oya li ye nenyanyu alike pethimbo ndyoka.

Omushashwa okwa hempulula eitaalo lye. Ehempululo lye olya lundululwa moshisoomi komuhongi Kurvinen, opo omu-

# OSHIKOLOLO SHOMEGUMBO

OMUPANGI TA HOKOLOLA:

ODIAKONIA.

Omukiintu Tabita mu Joppe okua li ha longo iilongantalanteni ojindji nokua gandja iikuaca ojindji nokua hondjele aaselekadi oombindja noohema. Ihe ha egongalo ljaajuuda alike lja longo iilonga iuanaua, ihe omagongalo gaapagani uo. Mepistoli kaarooma otatu mono mu 15:26 Makedonia na Akaia oju uuvanena okuhija ongalo joohepele jaapapuki jomu Jerusalem. Ojo jenz je shi hala. Pecimbo ndija aakiintu uo ja ningi nokuli aadiakoni jomagongalo. Aarooma oja njolelua: „Otandi gandja kune omuuameme guetu omukiintu Foibe, ongoka omujakuli guegongalo ljomu Kenkrea, mu mu taambe omOmuua, ngashika shoopalela aapapuki, ne mu mu jakule miinima ajihe a pumbua ekuaco ljeni; oshoka naje uo okua jakula ojendji na ngame muene uo.”

Ihe ecimbo sho lja piti uusiku ue ja. Uujuni ua humu komeho. Ohoole jotango jomagongalo ja tameke okupola. Ecimbo ndijaka lja lukua Ecimbo ljopokati. Oljo ecimbo ljomilema miinima ajihe. Omadiladilo gaantu oga pilika. Aalongi oja longo elongo lja gojoka. Noshu tuu uo mejakulo ljegongalo ja shuna monira. Ohoole ja Kristus inaji cimnika ue aantu, ihe ojo ja tameke okugandja iipeuahenda ja peue edimo po ljoondjo. Aajamba sho ja kala muufukedi uauo, nuulunde uauo oja tameke okufuta oondjo dauo okugandja oohpepele iikuaca. Aantu ojendji oja eca iilonga jauo no ja tameke okuhehela piijeelo jaaamba. Ejakulo ljatjangeji inali eta ejambeko lja Kalunga, ihe olje eta muujuni oluhepo lu vule shito. Aakiintu ojendji oja ji mongulu jaaikaleli no ja tameke okujakula aavu na analuhepo, shoka oja longua nokutja okujakula ngeji ota uapa okuilongela omuenjo gualuhe.

Aakatoliki oja holeka oohapu da Kalunga sigo omuhongi Luther okue di eta puujelele nokua tameke okulonga aantu noku ja pukulula. Oje okua ti: „Ipeuahenda kaji noshilonga mehupico ljomuntu. Ombinzi jOmuua guetu Jesus Kristus auike taji dimi po oondjo detu. Moluesilohenda lja Kalunga aakriste oja manguluka kiilonga.”

Nokua ti isheue: „Nagu sindue omuenjo guandje nguka tagu ikalele! Ngele tua peua omagano omanene otse tu nokuifupipika nokuigandja mejakulo nokukalela oojakuetu.”

„Nando tatu simanekua molu iilonga jetu nenge molu eicano ljetu mokati kaantu tu nokuigandja mejakulo. Omusimanekua nguka e vule oojakuauo nesimano ni ishundule pevi okukuaca ajehe nuudiginine. Kalunga okue tu pa uujamba uesilohenda, ihe ite tu pula sha shilue, shika ashike: shaa shoka tua ningilua kuje, oojakuetu tu noku shi ja ningila uo.”

Oshilonga shejakulo osha tameke momagongalo no sha huma komeho kashona na kashona. Ngashika Luther nosho tuu pua holoka aalumentu naakiintu jalue mboka ja tameke okulonga aantu okuja-

kula. Moshilongo shaanduisi okua li omuhongi Flidner. Oje okua tameke oskola jaa-diakonissa (aahungi jaavu).

Omuhongi Bodelschwing okua tungile uucigua oongulu odindji nokue u putuda. Aagundjuka aalumentu naakiintu sho ja putudua okujakula aavu naanaluhopo oja ningi aadiakoni naadiakonissa jomagongalo. Ontseno ombuanaua oja kunua no ja tameke okuiima iijimati iuanaua nopetameko nokuli.

Nena pecimbo ljetu oshilonga shika shadiakonia osha simanekua momayi agehe gaaluteri. Aantu oja mono nkene ejambeko lja Kalunga otali landula mboka je egulula omuenjo dauo niikaha jauo okukuaca aanaluhopo.

Otua hokua okutja: Egongalo ljaaumbo oljo okanona kegongalo lja Suomi. Okanona oka hala okuholela jina. Tu talengele meme e na sha okuholelua moshinima shika.

Oshilonga sha Soomi osha ninga ecimbo ele oshilonga oshikriste, ngele tashi uapa okutja ngeji. Onke ano oforomenta jetu otaji pangele naua oshilonga. Iipango joforomenta otaji popile aacigona ajehe ngele oohepele nenge aajamba. Aantu ota: gandja oompale, niimalua mbino otapu tungua oonasaesa noongulu duucigua, naasindjala taa kuacua n. sh. t. Ecimbo limue aantu oja tala nokutja ekuaco ndika olja guana lja guanenena. Ihe momasiku getu aantu oja papuduka shili. Ombepe ja Kalunga okua tameke okulonga momagongalo getu. Aasitagongalo oja tameke okupula aadiakoni. Miigongi jauo oja tameke okukundacana: „Tu ninge ngiini aakuanegongalo jetu naa tonaticue okumona oluhepo luomushiinda?” Noja tameke okuuvica nokulombuela: „Ecimbo lja cikana okupenduka. Ehala ljoMuua oljo ndika: Tu kuacacaneni, tu hoolacaneni miilonga no moshili.”

Aagundjuka oja minikilua, ojendji oja hokua moshilonga shejakulo noja ji moonasaresa ja longue mo ja uape okutaambuz momagongalo kokujakula nokuhunga. Osho tua humu komeho. Omumvo 1944 moshigongi shepangelongerki opua tungua iipango jiumue omagongalo ge noku ji diginina. Iipango mbino onda hala oku ji njola mu tseje ejakulo olja uucua ngiini mu Soomi pecimbo ljetu:

11 § Egongalo kehe oli nokudiginina oshilonga shontalanteni shopakriste nokulongica aajakuli mboka ja pumbiua musho.

88 § Oshilonga shontalanteni shopakriste tashi lalakanene okukuaca aanaluhopo jegangalo iinima jopambepo nojokolutu nojokeliko. Ekuaco ndika oli nokuza mohoole jopakriste. Unene ajehe mboka je noluhopo olunene lu vule oojakuauo, na mboka itaa mono ekuaco lilue naa kuacue ngeji megongalo.

Moshilonga shika shontalanteni shopagongalo egongalo kehe li nokulongica aadiakoni (aajakuli), ngele aalumentu nenge aakiintu.

Oshipango shino osha guedelua ko oohapu doshigongi shaabishofi, otadi ti ngeji:

Omolua shika egongalo tali kambadala miiljo jaljo ajihe okupenduca ehala ljoku-kuaca, no tali diginine oshilonga shejakulo shopagongalo (odiakonia) oshilonga shuu-

sita shi kuacue kusho, opo Kalunga na aadimicue nomunaluhopo kehe a kale u uuvite nkene egongalo lja hala okuhumbata omutenge gue noku mu kuaca pankondo daljo.

144 § Omusita guegongalo e nokus'la oohepele jomegongalo oshimpuiju okutsejicila aajakuli omadina gaamboka ja pumbua ekuaco nokutala nkene taa peua ekuaco ljopakriste lja guana. Natango e nokuhumica cshi'onga shontalanteni komeho megongalo lje ngashika pua uucua pampangondjika.

287 § Egongalo nali gandje iimaliua ja pumbiua moshilonga shontalanteni ngashitali shi vulu nokutala eliko ljaljo nokukala kualjo akuhe.

Tadi tsikilua.

JALOO SHO UE JA PO!

Eti 15/4 56, otua talelua po komujakulitonatelishitajingerki guetu. Okonjala aakriste ajehe jomomikunda dika dokomakuti gokuuninginino uOndangua tua gongalele po pongulu jomEheke.

Ecimbo ljelongelokalunga sho lja ciki, tua ji mongulu jetu, ihe natango aantu ja li po ojendji pondje, momiti adihe da kankula nondjugo muuda aantu.

Melongelokalunga otua dimbulula juhe jambeko ogendji gOmuua. Euvico ljoango Joh.10:1-10. lja kala ongoshipatululo oku tu egululila muusita nometonatele ljoMuua Jesus. Oje omusita noonzi odo egongalo lje.

Meuvico etijaali Joh. 10:9. tua jelicia naua Jesus oje osheelo, ondjila jokucika megulu.

Neuvico etitatu Joh.10:1-5 tatekulu a peua ohenda onene okuholola nuuladi oshiholekua shika oshinene shohenda ja Kalunga. Okoonkondo da Mbepo okue tu jelicile nkene aauiliki taa vulu okupukica aauilikua.

Nda ti, ando ngoje omuuliki omukuetu ua pulakene euvico ndika, oshili uungame ando ua mono oshilalo oshinene. Nani hamusita, hamulongi, ha mukuluntugongalo nomuevangeliste ajeke je li po aauiliki, aue, omukuanegongalo kehe oku li po omuuliki. Euvico ndjoka olja eta shili uumbanda unene maakuanegongalo. Epulo enene ndjoka otse aaheke tua hala li uvike komuulikihapu kehe:

AAULIKUA JOJE OTO JA CIKICA KU KALUNGA, NENGE OKUSATANA? Osho tatekulu a pula.

Okua kala okangundu kaaambi. Tala kuume, kaje shi ojendji, kaje shi aagundjuka. Mentu mukuetu, oondjimbo tadi zi moongandji. Ongoo tadi zi maajengeli!

Omusitagongalo a lesa Heb.13:20,21. Elongelokalunga sho lja pu, tua fuda po kashona, notua shuna mo, e tamu kolekua ehanganoo ljaakriste jomiisati.

Elaka lja hugunina lja tatekulu: Kalunga ne mu jambekule okukala po kueni mpaka.

Ongundu ajihe ja ti: Jaloo sho ue ja po!!

J. Ekindjo.

# Oshikololo shaagundjuka.

GANDJA KOMUUA.

Gandja kOmuua no kiita je Ecimbo ljokuenje kuoje! Mpa uuladi uo opalele Noondjimbo duugundjuka uoje. Nosh' oonkondo doje mpa Tadi digupal: cua Mokutanga Omuua, Mokutanga Omuua!

2. Ngunthu ndjika j:pameko Ebandela ljetu tala! Tsacaneni eihanjeko, Kukuaca aankundi tua hala. Nale sho tua kondjele Kumue, otua sindile Mokutanga Omuua, Mokutanga Omuua.

3. 'Pandela ljesindano oljetu omushigakano Jesus nale a sindana No nena omusindani ano. Onke natu mu landule Sigo cm:gulu lje Nokutanga Omuua, Nokutanga Omuua.

4. Uaa na Jesus, osima nga Oo ikondo odoj' ho mana; KOmuua Jesus igameka, Oonkondo do doje da tana. Nokukala kuoje mpa Jesus ota simana Mokutanga Omuua, Mokutanga Omuua.

Nando eimbilo ndika opo lja lundululua mOshindonga, tali tsejika nokuli kaa-gundjuka ojendji oshoka oli na eui lja tsejika nale. (Tali imbua ngashi "Muene Jesus ta itana")

Mokuimba eimbilo ndika ondu uvite nda kumikua omukumo. Momuenjo guandje tamu huama sha. Tamu penduka ehala lja kola okulandula Jesus, ngashi naa naa omukuiita ta landula omuhingi guiita, kee nuumbanda, oshoka oti inekele ngoka te mu landula. Ndu uvite nda hala oku mu gandjela ajibe jandje e ji longice pahalo lje. Nge tandi ende tandi imbi eimbilo ndika, compadi dandje -nando da vuulua-tadi peua oonkondo oompe noda hala okuendelele.

Ihe olje a toto iitja? Nomutoti gueui oje olje? Tu ja taleni ano!

Omutoti gueui oje omuputudi gaa-gundjuka. Ngashingeji ta longo meputudilo ljaalongi mu Soomi. Oje okuumelela kaa-gundjuka. E ja halele uanaua uashili noje a hala oku ja fala ku Jesus. Uunene a hala oku ja ulukila kutja pu Jesus ope nenjanju lja shili, oshoka opuje opu nediminopo ljoondjo. A totele omaimbilo oge-ndji omaui goopala. Edina lje *Matth. 1:1-5*.

Omutoti guitja ngiika ue mu diladila nokuli oje a li omuntu e nuuanaua auhe kokuza kuukolele uolutu sigo uomuenjo. kee nuudigu ua sha. Ngika to ka kumua ngele tandi ku hokololele okukala kuenkene kua tja.

Edina lje *Simo Korpela* noje uo omu-soomi. Omua muene e mu pa omagano guuteuo, ihe Omua e mu pa uo uudigu ouindji, sho e mu kuca uukolele uolutu. A li omusitagongalo, ihe oluindji a ningi omacimbo ina uapa okujakula aakuanegongalo je; a lala ouala mombete. Uuvu ue ua li uudigu shili okuhumbata, ihe muudigu ua tja ngaka oje a pja a guana okupe-ua uuteuo mbuka ua ningi ejambeko ljoje-ndjijendji. Uuvu ue ngele ua geja ina

SAMUEL MORRIS.

Omulunde oku ud'Ombepo Ondjapuki.

Samuel Morris, edina ljopapagani Kabor, okua li gumue guomaafrika jokuuninginino, omuna guomukuanilua. Manga a li omushona okua kua tua miita kaantu jamue e ta ningi omupika nomukuanilua oje okue mu dengica esiku kehe, opo he e mu kulile niikulila iidigu nge tu uvu omumua-na ta hepekua ngaaka. Navulua Kabor okuz ji ontuku mokuti oshoka ina vula ue okuididimika e ta ji sigo komunkulo nko-ka a taambelua miilonga pofalama jokoofi.

Gumue guomu mboka, ja longo na Kabor okua li omukriste nokue mu fala nokuli mongerki. Kabor a uvu mukua uo sho ta galikana e te mu pula: „Oto ningi shike?“ Omumati a jamukula: „Otandi popi na Kalunga.“ Kabor a pula: „Kalunga omushike?“ Omumati ta jamukula: „Oje Tate.“ „Oto popi nabo nani?“ Kabor a pula. Okuza kesiku ndjoka Kabor egalikano okue li icana „okupopja na Tate,“ nokua tameke okugalikana je muene nzija. Okua galikana uusiku nomutenja neu lju uvitike. Sho a kugu ngeji oojakua uo mokati kausiku uo, okua kudile oojakua uo mboka ja longo naje. Osho okua tameke okuja mokuti a ka galikanene mo. Esiku limue sho a galuka kegalikano, okua li a vulua nokua ji kokalili ke nokua li e nuudigu uokomuenjo, ihe ohaluka jouala mondjugo je mue ja uujelele ouindji. Okua li e shi etango tali piti, ihe uujelele oua li ui ili, nondjugo oja li ju udilila eadimo. Ncpo tuu mpoka uudigu ue uomomuenjo ua kana nomuenjo gue gu uda gu udilila enjanju. Okua tameke okunuka ta tanta kenjanju ongoshilema shijaka posbeelo shotempeli sha aludua kaajapostoli. Jamue ja diladila oje ta ji onkuengu, noojakua uo ja diladila ompuiduli ji li muje.

Mokulonga okoofi okuilongo oshien-gli-sa nokulesha nokunjola. Omutumua gumue e mu longo. Komeho okua ji koshilando shopomunkulo guefuta nokua ningi omugajeki guondomo. Oko tuu nkoka a jele-

uapa okunjala nokuli, ihe momuenjo gue ngele mua aanduka okateuo okape, oje okua icana omukulukadi gue nenge omu-muana ngoka a njola peha lje shoka e mu lombuele. Osho ngeji uuteuo ue ouindji ua totua.

Konima Simo Korpela a kanica aamati je jaali ja sile miita. Noje muene uo a ji mevululuko ljaana ja Kalunga. Ihe uuteuo ue otuu kala u nomuenjo, ua ningi ejambeko ljaamboka je na ecimbo ljokue-nje kua uo nosho uo uaamboka ja ciki ke-cimbo ljokufu kua uo.

Ihe ngoje omugundjuka: „Gandja kOmuua no kiita je ecimbo ljok: e vje kuoje. . . natu mu landule sigo omegulu lje, mokutanga Omuua, mokutanga Omuua.“

A. H.

lua koshinima shika a ninge omuuvici guevangeli mokati koshiguana she muene. Okua kundana uo omolu oshinima shika oje e nokuja moskola, noskola ndjoka ote ke ji mona mu Amerika. Ihe ota ji ko ngiini? Moshinima shika okua „popi na He“ nokui inekele uo shili, kutja ota ka mona ompito jokuja ko, oshoka Kalunga te ke mu sila oshimpuiju. Okua tala ooskepa do-ka tadi endica aantu navulua je muene a taambua moskepa jimuc a ninge omunavijo moskepa ndjoka. Iilonga ja li iidigu, oshoka ina tseja iilonga mbjoka jomunaskepa. Omukuluntu guoskepa okua ningi omuenjo omuinaji, oshoka sho a taamba Samuel, okua li a luka oku shi iilonga. Niisheue aalongi jiiilonga oja tuku Samuel ihe oje a kala e nombili jomomuenjo. Esiku limue a ka opaleka mongulu jomuhona guoskepa na mpoka a mono uo ompito okuhokololela omuhona nguka Omua Jesus. Nomuhona okui itedulula nosigo ojendji jomaaniilonga oojakua uo oji itedulula noja ningi oo-kuume ke. Sho a zi moskepa oje mu pe oonguuo odindji. Tadi tsikilua

## EMINIKO KOVANASKOLA OVAKUETU.

Onda kala alushe noku mu diladila onje amushe ava tua longua nanje meeskola dounona nokulipula kutja oonima noonima oko tuu mbela ve li? Ove li tuu natango meempadi dOmuene ngaasi tua longua? Heeno ondi shi shi tuu nokutja vamue ove liteeka po Omuene, va landula ounjuni. Nde nande ongaha amushe ohandi mu minike mOmuene nodjuulufihoole, omoku mu diladila amushe. No nande ndi shi shi kutja vamue mua tunga omaumbo nomapata ngaashi ame, ohai ti: kundueni.

No komesho a eji aisho ohai ti: Tu landuleni ondjila jOmuene, tu djuulukueni oku ka kala mekolo lAbraham. Tu lidule ni ounhu uounjuni fje tu djaleni Kristus Jesus. Kondja ekondjo liua, hulifa po oluendo lounjuni, ino hekua kuo, otuu ku tuala mekano omo to ka kala nokulila nokukuuana. Oshili ito di mo vali, tu hokue okukala mOmuene tu kondje fimbo pe na efimbo inatu loloka. Lasha. Efes 5:1-11.

Kundueni unene.  
Ame Friedrich David  
Endola.

## AANTU JOMU SUIDWES-AFRIKA.

Omumvo 1954. mevi lja Suidwes-Afrika omua kala aantu mbaka:

Aatiligane	50,000
Aauambo	200,000
Aakavango	25,000
Aaherero	50,000
Aantu jokOkajoko	10,000
Aantu jokoCaprivi	15,000
Jalue (ano aanama, naadilotsa noombasteri naakuankala nosho tuu)	120,000
Ajehe kumue	470,000

(Volgens "Bantoe")

# O K A A N D J E T U

## „LONGELENI OMUUA NENJANJU.”

Ongula jesiku ljetango lja Junie omaimbilo omauanaua go opala ogu uvika kelugo ljaanandjokue. Mokupenduka esiku ndika enene otu uvite enjanju nelago omolu oshituci shoka tashi ka danua nena. Aapangi aape 13 taa ka japulilua moshilonga shejakulo mongerki jokOnandjokue. Oomvula 3 nokuli ojo ja longua moskola jaapangi.

Ongerki ja longekidua okutaamba oshituci shi cike mpaka. Oja zalekua iuanga noongala nookinteli da huama. Aajenda jaapangi aape oju uudica ongerki naatumua jamue omo ja li uo naanandjokue. Omoitu uushona uongerki jetu aantu ojendji ja cikama pondje.

Ongendjo sho ja tono lutijaali, aapangi aape ja heda kongerki melandulacano. Oja ulikua komulongi guauo Greta Airaksinen. Posheelo shongerki oja zalekua uungala uushona komulongi Maria Amuaalua.

Petameko ljoshituci otui imbi eimbilo 379 nomusamane Abisai Henok okua ningi egalikano. Konima jeimbilo 531 meme Greta okua popica ojana nokua ti: „Esiku ljetjangaaka tali penduca mutse omadiladilo gamue. Tango enjanju. Oshoka mua icanua ku Kalunga omaicano gaali. Naale nokuli mui icanua mu ninge aana ja Kalunga. Esilohenda enene shili! „Oshoka one inaamu peua ombepo juupika mu kale isheue muumbanda, ihe omua peua ombepo juuvalua, mu ndjoka hatu icana Abba! Tate!” (Rom. 8:15)

Nomua peua eicano ekuauo isheue omua inekelua mu jakule aavu. Onena tuu ndjika otamu ningi aahungi jaavu no tamu taamba oonzapo deni.

Longeni aluhe nokuhambelega Kalunga, omuicani gueni omunene.

Dimbulukueni: ongame nda icanua nonda inekelua, nda japulua nokuli ndi kuace medina ljOmuua omuvu tuu nguka tandi mu aada nena.

Eeno, oohapu da Kalunga nadi kale omuminikili gueni esiku kehe.

Inamu galikana Omuaa e mu pe iilonga taji jeleke oonkondo deni, aue, galikaneni Omuaa e mu pe oonkondo tadi jeleke iilonga jeni.

Ongundu jaaimbi onene ji imbi eimbilo ljoopala nomundohotora Inkeri Saloheimo okua popica aapangi noohapu dika: „Ohooole ojo oshinima shotango mokukala no mokujakula kuaapangi jaavu. Kalunga oje ohoole. Ehalo lje oljo oku tu pa ohoole ndjoka tatu ji pumbua.”

Omupangi Maria Fredrik okue tu hokololele naua nkene aalongua ja humicua komeho kashona na kashona moskola jaapangi sigo esiku tuu ndika ja taamba oonzapo dauo. Esiku ljenjanju shili. Onke ano: „Omuenjo guandje, hambelela Omuaa, no shaa shoka sha kala meni llandje, edina lje ejapuki!” (Eps. 103:1).

Sho tua imbi eimbilo 239 1-4 omukuluntutumua B. Eriksson a ji koaltari pamue naasitagongalo Malakia Alugongo na Abisai Henok. Oje okue tu fatululile oonkondo doohapu da Kalunga. (1 Kor. 2:4-5, Rom. 16:6, Iil. 3:2-14).

Okui icana aapangi aape ja cikame komeho goaltari. Omupangi kehe okua tentekua iikaha nokua jambekua nejambeko ljOmuua. Ecimbo ljoopala shili. Ojo ja lombuelua: „Indeni nombili je!”

Aajambekua oja punguluka no ji imbi eimbilo ljauo jene:

„Iikaha jandje, ngoj' Omuaa,

Noonkondo doj' oonene

Nuupenda uo nohoole joj' Ji guma, jo ji jele

Ndi hunge najo omukueji ngo

Ta alukua nejematoo.”

Oshituci shoopala shejambeko noshejanju sha danua nomahalelojambeko taga landula aahungi jetu aagundjuka.

S.H.

shashi wo e li uuve ko. Pamwe omushashi okwa li wo a longwa moshindonga etumbulo ndyoka e noku li tumbula pokushashwa kwo kwene, oshoka moshifo shetumo olya nyanyangidwa wo moshindonga. Otatu li tula wo mpaka naanaa ngashi omushashi a tumbula. Okwa ti:

EVA MARIA, TE KU SHASHA...

Osho ngeyi omutango gwaawambo a taambelwa mehanganoo eyapuki lyaakriste ayehe kokule noshilongo shaandjowo. Moshifo shetumo omwa nyolwa mwa tiwa: „Otatu kumagidha ayehe mboka ye hoole Omua Yesu noshilonga shetumo tashi longwa mOwambo: kwatheni sheeli shetu nguka Eva Maria nomagalikano geni.”

Eva Maria ina kala koSoomi sigo ahuhe. Omumvo 1879 oye okwa thikama koSoomi nokwa thiki mu Januarie 1890 kOmaruru nkoka kwa kala omuhongi Pii-rainen. Eva Maria okwa ningi omuleli guunona we. Konima yoomvula dhimwe oye okwa shuna kOwambo ko kwene nokwa hokanwa komuwambo omukriste. Esiku eti 19 lya September omumvo 1929 Eva Maria okwa mana oondjenda dhe a gwanitha oomvula 53 muukriste. Oomvula dhe adhihe kumwe odha li ngiika 67.

Moomvula ndhoka 53 mOwambo mwa aadhika mwa shashwa aantu oyendji. Omagongalo oga dhikwa koombinga noombinga. Aawambo oyendji oya putudhilwa nokuli oshilonga shuulongi woohapu dha Kalunga, nomumvo 1925 kOniipa kwa li kwa piti wo ongundu yotango yaasitagongalo aawambo. Gumwe gwawo, omusamane Simson Shituaa, okwa yapula ombila ya Eva Maria komaeendo gokEngela. Osho ngeyi oshilonga sha Kalunga osha li sha aadha shili kokule moomvula dhomuntu gumwe.

Ngashingeyi epipi ndiyaka lyaakriste yotango lya hulu, ihe oohapu dha Kalunga otadhi tu kumagida tadhi ti:

„Talen i ehulilo lyoondjenda dhawo, holeleni eitaalo lyawo.”

## UULONGI WOOMVULA 40.

Mongerki yokOshigambo eti 6 lya Mei 1956 popepi nolugumbo lwoaltari pwa thikama omulongi Joel Henok, ngoka a longo megongalo lyOshigambo oomvula 40.

Omulongi Joel a tameke oshilonga shuulongi omumvo 1916 mOshitambo. Omumvo 1917 a tembudhilwa muuzilo wOshigambo momikunda dhaapagani.

Omulongi Joel okua longo shike? Oye okwa li omulongi gwokanyonyolo tashi ti: omapakolwa. Omwene gwomukunda gumwe omupagani, okwa ti: „Joel to yono omukunda gwandje, omukunda aguhe tagu ti: A A A A A! ongomakola”. Ihe nando pwa kala ngaaka Joel a dhiginine oshilonga she shokanyonyolo ina tila omagandambadhi. Okwa dhiginine oshilonga she sigo 29.3.56

Omusitagongalo David Shihepo melaleko lya Joel a hololele egongalo pafupi oshilonga shomulongi Joel nkene sha li po oshinene. Joel a tameke pethimbo edhigu shili pomumvo gwondjala nekomba 1916. „Ngele tatu dhiladhila megongalo ndika yangapi ya longwa okanyonyolo ku Joel naa thikame!” Oyo oyendji shili mongundu ya mboka ya thikama ya longwa okanyonyolo ku Joel mwa li aalongihapu 4 nomusitagongalo 1 Joel nando ta lalekwa nombili a ka vululukwe oshilonga okwe shi valelwa, omukuluntu gwomanongelo getu S.Kyllönen a holola kutya natango Kalunga ina etha omusamane Joel nguka a kulupile ngeyi moshilonga. Kalunga a hala natango oku mu longitha wo nomegumbo. „Olwindji sho tandi yakula mboka taa landa uumbo otandi mono omusamane Joel ti itsile kontondye ye te ya kenongelo ta landulwa komwana omulongikadhona meme Miina. Yangapi taa landulwa kovana miilonga yoshilongo sha Kalunga?”

Peha lyegongalo omusitagongalo D. Shihepo a gandya omagano gepandulo komusamane Joel, nopeha lyoskola omukuluntu gwomanongelo a gandya wo omaganopandulo komusamane Joel.

Omusamane Joel a kumagidha wo egongalo li kale noku mu galikanena. „Pamwe nale inandi ya miipwe omolu ohoni yuulo-

ngi ihe ngashingeyi omutondi pamwe ta ulukile ndye nande uuyamba mboka ua popiwa mpoka, galikaneneni ndye amuhe mboka inandi thikama kiipala yeni, naa mboka nda thikamene kiipala yeni.”

Kalunga na pewe esimano keyakulo lyomulongi Joel, nokungoye wo u li moshilonga natango. Ps. 22: 23-26.

J. A. Nantinda.

## EHAMBELELO LJOMUGOJA NO LJOMUVU MUENE.

Omuenjo guandje, hambelela Omuaa, no shaa shoka sha kala meni llandje, edina lje ejapuki! Omuenjo guandje, hambelela Omuaa, ngoj' ino dimbua uuanaua uasha, e u ku ningila! Ps.103.1-2.

Nda li nomukuetu te ehama okugulu, otua ji kOndangua. Ondohotola jokOndangua oje mu lombuele a je kOshikuku. Mokueenda kuetu, inatu tseja ondjila. Kalunga okue tu tumine omuntu ta ti: „Ndjoka hajo ondjila, ondjila oji li mpee!” Nando tua lamba ondjila ndjoka tua lombuelua, inatu tseja ko. Kalunga okue tu tumine isheue omuntu u uka hoka tatu Etsikilo kep. 8.

## SHITLANGU.

omuna guokombanda

Lja njolua  
ku  
Andre de Clerc  
na  
Edoardo Mondlane

Lja lundululua  
ku  
Hosea Namupala,

Etsikilo.

Oongonjo adike.

Shitlangu sho a li ha lica popepi negumbo okua fa a li e na oomvula hetatu nenge omugoji. Okua lica pegumbo oomvula ngapi? Naje muene ke shi shi naua.

Sho a tameke okulica komakango gokokule okua fa a adika e li poomvula omulongo na mbali.

Omumati omumbantu omuna gua Khamban ke na okumuena ecimbo ele. Onda ndjanga mbala.

Esiku limue Majeriman okue ja okutalela ndje po. Okua tokola a ninge guumuusita uandje. Oti imonene mo tuu uuanaua uasha? Ota vulu tuu okuninga kuume ketu? Kombinga jimue jemuene oku shi okuinekelua na otu na shito ekuatacano naje.

Uulicilo uokokule inau fa mbuka uo-pegumbo. Ano opua kala ngeji. Oongombe odo hadi piti tango ongulungula di je kuusita oku ka napa naua. Oomuiidi ngele opo gua gu omume, oongombe ohadi li naua. Omutenja ngele gua tsu kashona, otadi galukile kegumbo,

Esiku limue otua tokola otse tu je tango kelundu ndi hali licua notue shi ningi. Nanzija otua mono oongombe oonene dooniga oonde. Iikombo jetu oja tala, ja kua-tua konkumue noja dimbua okunapa nokufuda noja cikama ja muena. Oongombe oonene ngiini!

Uukombuena uandje sho u uvu iifudo joongombe tadi napa, oja ji ontuku. Ihe ontsezi jaandjetu ndjono haku tiua oKapokolo, inaji tilicua koongombe do domitse ominene. Onzini jimue sho ja tala ontsezi ndjoka, ontsezi oja shuna luanima noja denge onzini ndjoka oshipala mokugulu. Edengo ndjoka olja li ljombadilila nolja li edigu. Okonjala nokuli ongombe ji kambuke onkene oja ji ontuku. Kapokolo oja tameke ihe okuinepeka noonkondo. Ihe ontsezi ndjika kaji shi ongoja, ji nukile ando ontsezi jongombe. Oda talacana ouala.

Oongombe oonene noontshona ode ja oojimue noojimue pelundu mpaka nodu udica elundu mpoka tua li po.

Iikombo noonzi detu oda tukuluka. Oda tameke okulalakana pu talike ndjo taji sindika.

Uudigu noua ningi uunene aasita noja eca shoka ja li taa ningi noja tala shoka tashi ningua kiimuna. Iikombo oja tsakanene noja tameke olugodi. Taji nuka ja cikama nomagulu gokonima, nomitse tadi tsakanene nokupumacana noonkondo, epolokoto ljooniga notali uvika kokule. Ano osho ngeji olugodi lua holoka miimuna.

Iikombo iinzini sho taji tsakanene otaji undulacana nokuehamekacana.

Olugodi luiikonbo iilumentu dluo oshinima oshidigu. Osho ja kala taji kondjo ominzini nominzini sigo ongulohi. Pamacimbo nomacimbo oja kala taji vululukua po kehe shimue, opo ji fude po noji mone oonkondo oompe. Olugodi olua ka hula ouala shimue sho sha loloka noonkondo. Shoka sha sindana osha tida oshikuauo, opo esindano li holoke puujelele.

Mongundu jikombo ja konda komacele gaali omu na okukala omalunduluko oge-ndji. Tashi ti shoka shi ji sinde ajihe ihashi kala nenjanju. Iinakusindua otaji kambadala aluhe okuipaleka musho noku shi sinda ootu. Omacimbo gamue nokuli shoka shi sinde iikuauo ohashi kala ouala mesindano uule uoshiuike shimue.

Otse pasita ohatu popicacana kuusita nokupendulacana kutja: - Mua lala po tuu? Ihe, eui ndjoka oli nokukala lja jela, tali holola esimaneko netilo uo. Na je uo nakupopicua oku na uo okujamukula mbala opo a holole eishonopeko lje.

Otua li hatu ja niikulja kuusita. Shaa ngoka oku na oku shi ninga noku ji gandja komukuluntu guusita opo omukuluntu guusita e ji ninge shoka a hala. Tse na Majeriman opo tu ihupicile jetu, otue ji holeke moshihua kokule nondjila.

- Ongiini mue ja nena iikaha jouala? osho a pula, nguka Hosan omukuluntu guetu.

- Itatu ji nani kegumbo pokati komutenja? Otatu ka lja kegumbo, osho tse tue mu jamukula.

- Oмогоja ne, omu na okutseja kutja shaa ngoka okua tegelelua e ete iikulja. Mu uvu ko?

- Ongula one nda tala. Itatu kala ouala nane tamu kotokele aantu ngaaka.

Elilo lja lilua koshikombo shaandjetu Kapokolo olja jono oonkundacana di. Otue ji kondeke tu pulakene nenjanju. Ihe iimuna sho ja mono aantu ojednji je ji kundukida oja ji ajihe ontuku. Hosan okua lombuele:

- Ngoje Mafuma, galula iimuna. Mafuma, gumue guomaanankondo juusita uetu, okua kuca odimbo je nokua matukile ko. Ihe gumue guomaasita okui igida nokua ti:

- Katu na ue sha shilue oshiuana shi vule okutala olugodi luiikombo?

- Otu na po mpaka aape jaali gumue guauo osho a jamukula. - Otashi tu njanjuda andola tu ja konakone.

- Naje tu njanjude ngeji gumue guauo na kondjice gumue guetu, osho omutitatu a jamukula.

Omukuluntu guusita okua njanjudua komadiladilo ngaka, nokua ti: - Oshoopala. Osho nashi ningue.

Mpoka otse nee tu li po. Onda tala Majeriman, oje nokua tala ndje uo. Otu uvite uudigu. Ope na ootu ompito okuza muupjakadi mbuno? Iipala jetu oja holola uumbanda netilo. Gumue guauo nokua igida:

- Oja tala, oja tala. Ja tala u tale.

- Kamu vulu oku shi henuka aakueta. Hosan osho a ti. Je ta tsikile isheue ta ti:

- Otashi kuaca shike okuhenuka olugodi? Olugodi oluo talu ku holola mpoka u li. Ngame ondi ikoleke nonda ti:

- Tse ndi shi katu shi aape mpaka? Katua li nani hatu daneni pamue oongulohi?

- Osho shili, ihe kape na omuntu ha vulu okujeleka oonkondo domukuauo muudano. Hosan osho a jamukula.

Ecimbo ndjoka onda tameke okusholola. Hosan okue engena pu mukuauo nokue mu nongonene uuhapu umue pokutsi, sho taa nongona otaa tu tala tse na Majeriman. Omitima detu oda tuna pokati komitse. Cta cikama mpoka tua huhua notuaa na sho tatu vulu. Jo otaa hogolola ngoka e nokukondja nena putse. Ngame onda kotokele naua omainjengo gomilungu da Hosan. Ngele a hala okutumbula Shitlangu mokunongona kue, omilungu de itadi ji kumue. Ihe ngele ta tumbula Majeriman omilungu de odi nokuja kumue luaali. Enjanju olje ja mu ngame sho nda mono omilungu de di injenge luaali. Ngame nda hupu.

Mafuma sho a galuka, Hosan okue mu lombuele eta ti:

- Mafuma, otu na po sha, ohiuanaua shi vule okutala ouala iikombo. -

- Oshike? -

- Majeriman ngono ou mu luete ndi shi? Okua ti aniaua ku shi okumatuka, ngoje isheue aniaua oho ende ua fa ongombe onzini. Ngoje aniaua oho li omajengele noongoongololo nota ti isheue . . . -

- Shike? -

- Aniaua shaa kapuka a kuca ete ka umbile ku ngoje oto ka li po nando okaihu. -

Opu holoka oondjola omolu oohapu doka. Majeriman ke shi shoka e nokuninga. Okua hindua, noshaa ngoka ote mu pe oondjo, nota eta omahongakanico guugoja nota tegelele shoka tashi ningua po. Nando Mafuma omushona molutu, paholoko lje oje omulumentulumentu, omunankondo molugodi, moongonjo, miiti nomokunua ondjumbu.

Olugodi olua tameke mbala. No inaapa ningua sha Mafuma okua denge Majeriman oshinkauanganjo moshipala, sha guana okuhata po omulumentu nando ona kale a kola ngiini. Ondi uete Majeriman i idingoloka. Oti ihata po? Aamentu jamue oja jolo noonkondo noja ti:

- Aamatjona oje nokuja muusita uetu nombinzi - ojo ompango.

Oshikumica oshinene sho Majeriman inaa gua koshidungue, Mafuma okue mu galukile nokue mu canga isheue a diginina, je Majeriman okua nuka. Je Mafuma otu umpile isheue nenkua, Majeriman okue li henuka. Okui ikankamekele mokukandeka sigo ta kododokua. Kuume kandje osho a tokola okutameka olugodi luo luene nokua tegelele omukondjici gue shoka ta tokola.

Mafuma ina eca Majeriman a fude po. Okua tameke nokuli okudenga. A denge Majeriman ongonjo, ta denge isheue onkuauo, je okua lundulula ta denge omankaua gomafololua (omafupi taga denge noshikaha tashi zi pevi), ihe osima jouala. Enkua kehe olja kadekua nongonjo nenge noshikesho:

Kuume kandje ondi mu shi onde mu tala nkene ta vunju omutondi gue. Onde mu pepa omeho ndi mu tse omukumo. Oje okua didilike kutja ondu uvite ko nonda panda uufale ue.

Tadi tsikilua.

## AAKRISTE JOMUAFRIKA.

Aantu ajehe jomu Afrika ja fa je cike ngashingeji poomiljona 207. Mujo omunaakriste oomiljona 25. Maakriste mboka aakuaevangeli oje cike poomiljona 12. Ano aapagani oje li po natango oomiljona 182. Mujo aamuhamedi oje cike poomiljona 88

30.4.1956.

"Esiku oljo tuu ndika Omua kue li ningi", oohapu dika oda ningi oteksti jomuhongi Narhi, sho kua shasha aantu jotango jokOkavango ku Kuring-Kuru momumvo 1926 na doka da kala momadiladilo gojendji jomuaamboka tua gongala najo okudimbulukua oshituci sheshasho shijaka shotango. Aajenda ja zi kokule ku Suomi no kOuambo. Ojo je ende oondjila tuu doka dopokati komakuti de endiua naale komuhongi Narhi. Ihe ngashingeji oja piti naua nokuendelela niuhauto iuanaua manga omuhongi Narhi omasiku ngejaka kua kauile okakambe.

Oshituci sha tamekicua komusitagongalo guoku Lupala, Matias Shikondombelo, negalikano nomeuvico lje kua popi nkene oombuto doohapu da Kalunga da kunua mepja ljokOkavango uo na nkene Omua ta tegelele ilja ji vale uo.

Pehala ljeshasho ljotango pua dikilua omushigakano omunene mpoka tua gongalele po moshituci shika. Omuhongi Otto Makkonen kua uvica nkene omushigakano guOmua Jesus Kristus ogua sindi uupagani nomilema.

Omukuluntutumua guOuambo, Birger Eriksson, mepopjo lje ljoshituci, okue tu dimbuluca nkene elaka ljahugunina lja Jesus, elaka ljokutaandelica evangeli, olja gandjua kaajuuli joohi jamue, okaashona jomoshilongo. Ando ja kala aanongoramata nenge aasaseri aakuluntu, ando ja jolo ouala elaka ljatjangaaka lja njenge oonkondo domuntu. Ihe aajuuli joohi mbaka ja lombuelua naale ku Jesus ja fale muule iijuulico jauo, oji ilongo okuinekela Jesus. Moshilonga shOmua omua icanenua mo mboka inaa longua no ngashika naamboka uo ja longua. Omua ta vulu okulongica aajuuli joohi ngashika aanongoramata uo, shaa je li moshikaha shOmua ji ifupipika.

"Osho ngaaka elaka ljuukriste lje etua no kOkavango huka" omupopi a tsikile, "Ihe ngele tatu tala kombanda jomulonga ngu nenge kokuti huii, otatu mono ehala enenenene moka inamu falua natango elaka lja Kristus".

Omukulupe Benjamin, nguka a longo oomvula hamano mboka ja li ja hala eshasho manga je muene kua li omupagani natango nokutegelela omuhongi, okue ja uo moshituci shika. Mepopjo lje okua dimbulukua omacimbo ngejaka gotango nuudiginine ua Kalunga. Omumuanamati gue, Lukas, nguka a shashua esiku ndijaka lje naale pamue nahe naamuajina, okua longo nokuli omimvo odindji moskola jaanona jokuLupala.

Kiipundi jokomeho kua kamutumba uo jamue jomaashashua mboka jotango naasitagongalo ojendji aasoomi naauambo naakavango jatatu.

Omusitagongalo guokOlukonda, Pinehas Kambonde nomusitagongalo guoku Kuring-Kuru, Gideon Muremi, oja popi uo moshituci shoka. Elongelokalunga ljoshituci olja ningua mongerki jokuKuring-Kuru. Aauvici ja li jaali, omukuluntutumua guo-

Okavango, Veikko Teinila, nomusitagongalo guoku Mupini, Elia Neromba. Omuhongi Teinila kua uvica oohapu dika da Jesus, kue di lombuele aalongua je": Iikulja jandje ojo mbika, ndi longe ehalo lja nguka a tumu ndje, ngame ndi tsakanice oshilonga she. One itamu ti: Onkene ku noomuedi ne, etejo manga inaali cikana? Tala, otandi mu lombuele: jeluceni omeho geni, ne mu tale omapja nkene ga tiliganene etejo. Ngashingeji nokuli omuteji ta mono ofuto, noomuma ote di gongele momuenjo gualuhe, opo cmukuni a njanjukue pamue nomuteji. Oshoka omoshinima shino oohapu doka oda tsa, omukuni okuiili nomuteji okuiili. Ongame onde mu tumu okuteja mbjoka namu ji longa, ojalua ja longa, one no mue ja miilonga jauo. Joh.4:34-38. "Jeluceni omeho geni" osho Jesus a ti. Ecimbo ndjoka Jeesus kua popi oohapu dika inali fa ndjoka lja guana okupopiua oohapu dika. Ihe mpoka aalongua ja mono omukiintu omulunde auike, mpoka Jesus kua mono omuntu nguka kui idimbulula ngashi e li. Jeluceni omeho geni. Osho tuu natse uo tatu ziminua okupopja, nando tua ningi aakuni ajeke manga. Onguka ta kunu oohapu dOmua, ne shi ninge meitaalo tuu ndjoka kutja oohapu doka otadi ka mena no tadi ka iima uo ecimbo nge lja cikana. Oshilonga shika cshOmua muene.

Omuhongi Paavo Korhonen nomusitagongalo Gideon Muremi ja jakula moaltari.

Komatangolela esiku tuu ndjoka aatumua ajehe jokOkavango nojokOuambo ja gongalele isheue mongerki kUulalelo Uujapuki. Nesiku tuu ndjoka ongulohi aajenda ja shuna nokuli kOuambo.

Ecimbo lja cikana okushuna miilonga. Ihe opu nuuanaua okushuna mo omuenjo sho gua talalekua no sho gu uud'omahambelelo moluoshituci oshiuanaua, shoka she tu dimbuluca kutja oshilonga niijimati jasho oji li miikaha jOmua.

M.v.S.

#### ELELO LJAAUAMBO JOMIILONGA JA C.D.M.

Omusamane David Shilongo, C.D.M. North Compound, Oranjemund, okue tu tumine ombilive taji hokolola okukala kuaatumuapangelo jomu C.D.M. oje ta tingeeji :-

Otua kala mu C.D.M. ecimbo li cike puule uoomuedi 15 okua kuJanuari 1955 sigo Maart 1956. Otua kala mo tatu longe kumue naahona jomu C.D.M. okuua ooveta diilonga. Otu li po omalenga 12: Johannes Nekongo, Alfrid Muifi, Simon Kauluma (Ondonga), Rehabeam Kautuina, Wilhelm Shali, Thomas Valombola, Fillipus Nghamua (Oukuanjama), David Shilongo, Gabriel Munjala (Uukuambi), Samuel Jona (Ongandjera), Simon Amutenja (Uukualuudi), Ambrosius Andjamba Ombalanitu).

Otua kala nokulonga moshiguana shaa-uambo jomu C.D.M. notua pukulula mo uo ojendji ja li je na okuguila moshiponga. Otue ja uuca neuuco euanaua, nojo inaa mona ue oshiponga. Ojendji jomaamati oja njanjukilua oshilonga shetu.

Otandi hambelele uo Kalunga sho e

#### OSHIGONGI SHOONGERKI DOMOMUKANKA GUUKUA-LUTHER.

Oongerki domomukanka guukualuther muumbugantu ua Afrika odi nehangano pokati kado. Aahogololua jado ohaa gongala omumvo kehe okukundacana iinima jado. Omoluoshigongi oshinene shokuMarangu oshigongi shomumvo 1955 oshu undulua sigo ketameko ljomumvo nguka. Esiku etimulongo lja Februarie osha gongala ihe kuJohanesburg.

Ehanganotumo ljetu olja tumu ko omukuluntutumua Birger Eriksson, nongerki jetu ja tumu omusitagongalo Timoteus Andreas. Aanashigongi oja li po kumue 15, mujo aaluude 6 naatiligane 9. Natango aahongi aatiligane 9 oja li po aajenda naapulakeni.

Sigo ngashingeji mehanganano ndika ljoongerki omua kala ashike omatumo nongerki daavaleluamo, ihe ngashingeji kua tokolua, oongerki oonkualutheri daanduisi jomuUnion di icanenu mo uo. Onkene tuu omualu guaanashigongi aaluude otagu ka indjipala, oshoka omatumo agehe ga kumagidua noonkondo, gaa pange aasitagongalo aavaleluamo oompito okutumina moshigongi shoka.

Moshigongi omua kundacanua uo oshifo shaakualutheri "Credo" (edina ndika ljoshilatina otali ti: "Ondi itaala"). Nando okuholola oshifo shoka otaku pula aluhe iimaliua ojindji, okua tokolua, ku kambadalu tuu natango oku shi njanjangidica. Oshi na aluhe iinjolua kombinga jelongo ljuukriste (uuteologi) ja njolua moshienglisa nenge moshimburu. Kehe oshifo otashi pula ocilinga jimue (1/-). Ehanganano olja halelela, aasitagongalo ajehe ji ihumice komeho melongo ljuukriste, ano muuteologi. Jamue otaa kuacua nokuli iimaliua mbjoka taje ji pumbua mokuilonga kuauo.

tu tumine ombepo ombuanaua okuididimikila aauinaji jomokati kaauanaua. Aauinaji nando naa popje omalaka omiinaji otue ja pukulula noku ja longela uuanaua.

MuNovember 1955 aahona oja dimbulula mutse, tua fa inatu njanjukua naua kombinga jiiilumbu jimue jomiina itaa uuvacana naua naauambo. Aahona aanene oju uuvacana, ja kuce aasamane jaali jomalenga ja topolelue aahona jaali, ja kale haje ende najo omasiku gamue. Okuenda taa tala iilonga momiina. Iilonga nojo oopala.

Otatu pandula aahona jomu C.D.M. muuteku uauo, sho taa tekula aauambo. Notatu ja halele ejambeko lja Tate Kalunga, ngashi je tu kongele uo noje tu kuaca moondjenda detu odila ndjika taji tu endica uule uootundi 3½ mondjila tua li tu nokuenda uule uoshiuike shimue nokuli komashina. Ano natu vulikeni kaa-kuluntu jetu aaholike, opo tu kale tu na Kalunga. Tala Kaaroma 13.

#### IIKAHA JOKUORANJEMUND.

Miinima ajihe onde mu ulukile, osho ngeji tu nokulonga nokukuaca aankundi nokudimbulukua oohapu dOmua Jesus e Etsikilo kep 8,

ONDJODI JONKOLUI.

Omumati guontumba, onga ngoje ngu, a nu omalovu, ta nu e ta nu, osigo a njengua kuguedela ko, noomposi de mu kuata pecimbo tuu ndjo. Moomposi a lala ondjodi nga ndji, a jaguma nkene moheli ta ji.

Eshina kombinzi lja tiligana lja ji kolutenda lja endelega. Masipa ga fikua meziko ljaljo, majemato gaasi ga uuvika mo. Momulungu mua z'omuku guiikolica mbjo ondeveli muene a teleke mo. Miikote aajenda oju uuda tuu ndo! Moocina oonene ja kuutumba mo. Oohepelelela naajambelega, aaluude niilumbu ja vundakana. Aashona naanene, aafupi naale meshina tuu ndjoka ja tsakanene. Ajehe meljenge ja manglelela, jaa uete po nkene taa vululukua. Taa uuka luoheli je endelega, taa ende nondjala, nenota je na, taa dengua kombepo, komutenja taa pi, iihuna ajike miikungulu mbi! Ondapo aluhe ja guedelua ko, nombepo aluhe ja pupjala uo, osigo oonguuo da lungunicua, olutu luouala taa kuutamba mba.

Ohaluka ju uuvu eli'agano. Omuntondi a jolo: "Ojaandjitu mbo! acimbo kouala tua ciki ko uo, kale na mbono taa iigida ko."

Etilo enene ajehe je na, orendji taa lili, taa galikana ondeveli, kutja ja eciue mo, ja shune tuu nkoka ja ziilile ko.

Ondeveli ite ja pulakene ta jolo ouala ta jo'elele, ta sheke aajenda je mboka taa pi, ta popica aantu mbo je, e ta ti:

"Ookuume, aluhe mua longele ndje, onkee kashi uapa, mu mbembelekue, muua mone ondjambi jilonga tuu mbjo. Ji peueni tuu, ji neguaneneno! Mua jugu aankundi nohepele uo. Omukongi guekuaco mue mu kandula po. Uugundjuka ueni ua jonekeka. Mua dini iipango, nua tuualala. Mua kondjo, mua kolua, mua kolokosha. Miifundja nomuunsa mua nenepala. Mui iteka Omushiti nehangano lje, mua gama kungame, mua longele ndje. Mua man'okufuta ondjila tuu ndji, mua guana mu kale onkoka ndi li. Nda hala, uujuuki u tsakanicue, omulongi a peue shilongelua she. Metuta ljomulilo mua tegelelua, omu na epupju lja guanenena. Aajakuli jandje haa hohele mo, omulilo gu huame mo sigo sigo."

Ompoka omumati a papuduka, a pusha, a tila, a kololokua, nomuenjo aguhe a galikana Kalunga, e mu kuace okuitedulula, e mu hupice shili miikolica uo. Kalunga noku uuvu egalikano. Omumati a ningi omuidiliki, a longele Omuua nuudiginini.

(Elundululo)

ITOKOLELA!

„Sigo unake tamu tengukile paali?" 1 Aakuan. 18:21.

„Ihogololeleni onena ndjika ongoka mue mu hala oku mu longela." Josua 25:15.

Oto kala ngiini niikolica? Dimbulukua, ope noondjila mbali adike:

1. Otandi nu iikolica. 2. Itandi nu iikolica. Aantu sho je li moongundu doka mbali, ando tu ja pule, shoka she ja fala mo. Pulakena mpaka omajamukulo gauo:

Epulo: Omolua shike to nu iikolica?

Omajamukulo:

1. Oshoka *ongame* nde ji hokua.
2. Oshoka iikolica oji li po ji nuue.
3. Oshoka *ongame* itandi mono mo ondjo ja sha.
4. Oshoka *ongame* tandi longica iinima jandje, ngashi nda hala.
5. Oshoka *ongam* ihandi mono enjanju lilue mokukala kuandje okudigu.
6. Oshoka onda hongololua koojakuetu, nongashingeji *ngam* nda njengua okui-mangulula.
7. Oshoka *ongame* nda hala okudimbua oluhodi luandje niimpuiju ajihe.
8. Oshoka *ngam* nda lesa mOmbimbeli kutja Jesus muene a shitukica omeja omavinu nomujapostoli uo Paulus okua ti: „Nua omavinu omashona."
9. Oshoka *ongame* onda hala okulongela ondeveli.
10. Oshoka *ongame* inandi hala okuvulika kuKalunga.

Taleni omajamukulo ngaka, nkene mu-go hamu monika oshitja shika „ongame." Omuntu ta lalakanene enjanju lje muene, ota kambadala okuimangulula je muene, ota fatulula O nbimbeli, ngashi je muene a hala, osho nosho. Onkee ota zimine nokuli, a ninge omulongeli guondeveli. „Inuna jola a oshukila mosnikaha sha Kalunga omunamuenjo."

Epulo ekuauo: Omolua shike iho nu iikolica?

Omajamukulo:

1. Oshoka *Kalunga* oha gamene ndje kujo.
2. Oshoka inaandi ji hokua ue.
3. Oshoka oku ji nua okuo ondjo onene koshicala sha *Kalunga*.
4. Oshoka onda hala okulongica iinima jandje nokulongela *Kalunga*.
5. Oshoka onda peua *kuKalunga* enjanju enene li vule ndjoka ljiikolica.
6. Oshoka otaji etele ndje oshiponga, shokolutu noshokomuenjo, shongashingeji noshaluhe.
7. Oshoka iikolica ja njengua okukuca ndje uudigu uandje.
8. Oshoka Omuua Jesus okua kondjica uunkolui, nomujapostoli Paulus uo okua ti: „Inamu kolua komavinu, moka tamu zi uuinaji kehe." (Ef. 4:18)
9. Oshoka inandi hala okulongela ondeveli.
10. Oshoka *Kalunga* okua ti: „Ino tala omavinu, nkene ga tiligana, nkene ga talika g'oopala moshitenga no taga kulukile mo mbala. Navulua taga ljana ngejoka no taga hiji mo uuzigo ongoloka." (Omajel 23:31,32).

11. Oshoka *Kalunga* okua ti: „Omavinu omusheki, omagongo onakukudila; no kaku nomuntu, ta kolua kugo, omunandunge" (Omajel. 20:1)
12. Oshoka *Kalunga* okua ti: „Omavinu haga fundjaleke." (Habakuk 2:5)
13. Oshoka *Kalunga* okua ti: „Jaje omboka ja pendapala okunua omavinu no ja vuka okuhanga iinua ulu u." (Jesaja 5:22)
14. Oshoka *Kalunga* okua ti: „--oonkolui -- kaa ci u u a oshilongo sha Kalunga." (1 Kor. 6:10)
15. Oshoka moohapu da *Kalunga* uunkolui otau jaluilua miilonga jonjama ji iigalala. (Gal. 5:19-21)
16. Oshoka inandi hala okufala oojakuetu mekano. „Uuanaua okukala --- iho nu omavinu, no ho idilike shaa shoka tashi tondica omuanjoko, otashi mu pundukica nenge tashi mu siica uunkundi." Rom. 14:21.)
17. Oshoka muukualuhe kamu niikolica - megulu kaji mo, nomoheli kaji mo.

Ou li mongundu jini? Itokolela nena! Itokolela naua!

(Pa Ligdraer)

OSHIKE . . . .

to kufa eenkono doku i dipaa. Osheshi nenge u li pambelela, Ompepo ja Kalunga ote ku kala kokule, osheshi ha tondo oilonga jopambelega. Ku uete vali apa moverse 8, Osheshi ava hava pangelua kombelele itava dulu okuuapalela Kalunga". Ompepo oje hano uoku ku kuafa. Moverse 13 pehulilo: „Oilonga jolutu nenge tamu i dipaifa kOmpepo, opo tamu kala mu nomuenjo".

Hano ito papuduka osheshi ku na Ompepo ua Kalunga. Ku fi ua Kristus. Ku udite apa, moverse 9 pehulilo: „Ou ehe na Ompepo ua Kristus' ke fi uaje".

Opo na pa ombedi, tai ku kelele u papuduke opo.

A. Kanalelo.

EHAMBELELO . . . .

ji. Sho tua ji mOshikuku, oondohotola ja hoka oje tu jakula naua, ja fa je tu shi nale.

Mokuza ko, oje tu tula metukutuku ljauro, no je tu eta pOndangua. Ondohotola jopOndangua okue tu lombuele tu je kOnandjokue, a ka tulue mosamende. Noshu tua ji mOnandjokue, omuvu okua lombuelua oomuedi omugoji Osho sha ningua uo. Nando a lala ecimbo ele, ookuku oje tu jakula naua. Tua kuacua nokuli ku Misioni. Inatu mona oluhepo luasha. No mokulala monasalesa, omu naahongololi orendji. Gumue okua ti: „Omukulukadi omugoja nani, oku shi omumuana ota aluka nani?"

Amuhe mbo mu li mOnasalesa koto-keni! Nena Selma Sakaria ote ende no ta longo iilonga je.

Tamu kundilua po komunjoli.

Elina Uusiku.

IIKAHA . . . .

di popi je muene: „okugandja ku nelago komeho gokutaamba" Iil.20:35.

One aakuetu mu li kuOranjemund otatu pandula sho mua kuaca egongalo ljaandjeni £4.10/3, omolu olamba shihualala. Johannes A. Nantinda.